

ԲԱՆԱՎԵՃԵՐ ԵՎ ՔՆՆԱՐԿՈՒՄՆԵՐ ДИСКУССИИ И ОБСУЖДЕНИЯ

ՄԻ ՎԱՎԵՐԱԳՐԻ ՄԵԿՆԱՐԱՆՄԱՆ ԱՌԹԻՎ

Պատմ. գիտ. բեկնածու Մ. Ն. ՀԱԿՈԲՅԱՆ

Մեր պատմագրության մեջ հայտնի է ուշագրավ մի վավերագիր, որ կրո-վան է պոլսահայ շրջանում 1860-ական թթ. ապստամբական շարժում նախա-պատրաստելու, այդ ուղղությամբ նույնիսկ կոնկրետ քայլերի դիմելու մտո-րումները և ձեռնարկումները փաստարկելու համար։ Դա Պ. Նորատունկյանի 1863 թ. հոկտեմբերի 21-ին Հռոմից գրված նամակն է, ինչպես ենթադրվում է՝ Մ. Խրիմյանին¹։

Չանդրադառնալով այդ վավերագրի այլևայլ մեկնություններին, որ տևող են գտել տարբեր աշխատություններում, այստեղ ուզում ենք ուշադրություն հրավիրել նրանում գործածվող մի արտահայտության վրա, որ մեր կարծիքով ճիշտ չի ընկալվել ու բացատրվել և շարունակում է հակառակ հետևությունների հանգեցնել։

Նամակի հեղինակ Պ. Նորատունկյանի մտահոգությունը հայ ժողովրդի ազատագրության խնդիրն է։ Այդ նպատակով որոշակի քայլեր ձեռնարկելուց և բանակցություններից հետո նա դիմում է «Հայր և Եղբայր» եկեղեցականին և շարադրում Հայաստանի ազատագրության իր ծրագիրը և անգամ թելադրում, թե ինչ է անհրաժեշտ անել առանց հապաղելու։

Խոսելով Ֆրանսիայի հովանավորության ներքո Լեհաստանի ազատա-գրության համար տարվող ընդհատակյա աշխատանքի մասին, նամակագիրն ասում է. «Պոլսեն բաժանվելես մեկ օր առաջ ձեզի հաղորդեցի «մայրաքաղա-քիս մեջ Գաղղիո ղրոշակին ներքև գաղտնի դավանանքյուն մը ի գործ դրվին ի նպաստ Լեհաստանի հեղափոխության»։ Դավանանաց առաջին հա-ջող քայլն եղավ երկու հազարի չափ այլևայլ ազգե մարդ զինելով Կովկաս խրկել Մանյան անուն նավապետին հրամանատարությանը ներքև, չերքեզաց օգնության համար»²։ Այնուհետև նա խոսում է «դավաճանաց» երկրորդ նպա-տակի մասին, որը հանգում է Կովկասում «ընդհանուր հեղափոխություն» հա-րուցելու և այդպիսով Լեհաստանին աջակցելու խնդրին։ Ինչպես հայտնի է, Պ. Նորատունկյանը մերժել է այդ ծրագրին աջակցելու շուրջն արված առա-ջարկը. «Որոշեցինք բնավ երբեք դերասանական պաշտոն մը չընդունել ներ-կայացվելիք ողբերգությանը մեջ», — ընդգծում նա և վկայում, որ «այս կար-ծիքիս վրա էր նաև պ. Պեշիկթաշլյանը»։

Այս ելակետով մոտենալով խնդրին, Նորատունկյանի «դավաճանու-թյուն» բառով է բնորոշում այն շարժումը, որի նպատակն էր աջակցել Լե-

¹ Նամակն առաջին անգամ հրատարակել է Դյուտ Աղանյանը «Դիվան հայոց պատմու-թյան» մատենաշարի ԺԳ հատորում (Թիֆլիս, 1915, էջ 55—58)։

² «Դիվան հայոց պատմության», հատ. ԺԳ, էջ 55 (ընդգծումները մերն են—Մ. Հ.)։

հաստանի աղատագրությանը, լեհական հեղափոխությանը, իսկ ընդհատակյա աշխատանք ծավալողներին համարում է «դավաճաններ»։ Սակայն ի՞նչ դավաճանություն նկատի ունի հեղինակը, ո՞ւմ է համարում դավաճաններ։ Ակընհայտ է, որ նրա խոսքը ոչ թե յուրայինների կամ համախոհների դեմ ուղղված զործողության, սեփական ազգին կամ որդեգրած զաղափարներին ու նպատակին անհավատարիմ գտնվելու մասին է (ինչպես թելադրում է բառի բուն իմաստը), այլ իշխողների դեմ ուղղված շարժման և նրա մասնակիցների, այսինքն՝ Լեհաստանը ցարիզմի լծից ազատագրելու և այդ նպատակով երկրից դուրս ընդհատակյա կամ բացահայտ զործունեություն ծավալողների, աղատագրական շարժման կազմակերպիչների ու մասնակիցների մասին։ Տիրող դասակարգի և իշխանության բառապաշարում դա դավաճանություն էր, իսկ նրա մասնակիցները՝ դավաճաններ էին։ Պատմականորեն այդպես է կոչվել քաղաքական նպատակ հետապնդող որևէ գաղտնի զործողություն՝ ուղղված իշխողների դեմ։

Հիշենք, օրինակ, էրզրումի ռուսական հյուպատոս, դեներալ-մայոր Ա. Գեննետի հաղորդումները էրզրումի (Կարինի) «Պաշտպան հայրենյաց» ընդհատակյա կազմակերպության մասին։ Մասնուրում և Գեննետի հեռագրերում ու ղեկուցագրերում կազմակերպության գործունեությունը բնորոշվել է իբրև «դավադրական», իսկ ընդհատակայինները կոչվել են «դավադիրներ» («դավադիրներն ունեցել են զինվորական կազմակերպություն»)։ Ինչպես մատնանշում է Մ. Ներսիսյանը և ակնհայտ է նրա հրապարակած վավերագրերից, զիվանագիտական ղեկուցագրերում «հայկական գաղտնի ընկերություն», «հայկական հեղափոխական ընկերություն» արտահայտություններով բնորոշվել է էրզրումի «Պաշտպան հայրենյացը», որին էլ միաժամանակ վեղադրվել է «դավադրական» գործունեություն, իսկ նրա անդամները համարվել են «դավադիրներ» («заговор», «заговорщики»)³։ Նույն արտահայտություններն ու բնորոշումները բազմակի գործածություն են գտել նաև Ռ. Հովհաննիսյանի հրապարակած փաստաթղթերում՝ ռուսական դեսպանությունների ղեկուցագրերում, որտեղ ևս հաղորդվում է Կարինի նույն ընդհատակյա կազմակերպության մասին⁴։

Հենց այդ իմաստով է «դավաճան» բառը գործածում Նորատունկյանը՝ անտեսելով նրա բացասական իմաստը և նկատի ունենալով քաղաքական, աղատագրական այն նպատակը, որ հետապնդում էին «դավաճանները»։ Դասկանհայտ է դառնում նաև նամակի շարունակությունից։ Առաջարկելով գործունեություն ծավալել Հայաստանի ազատագրության համար և «ձեռք-ձեռքի տալով» խորտակել «Հայաստանի անգութ շղթաները», նա գտնում է, որ պետք է հառնել այն բանին, որ հայության մեջ ներթափանցի ֆրանսիական ոգին («գաղղիական կյանքն»), արթնանա «վաղեմի հայկական հայրենասիրությունը», «խորին քաղաքականության և ճարտար զինվորականության հանճարը»։ Այդ նպատակով հարկ է ստեղծել մասնաժողով, ընթացք տալ ազգային «արտաքին գործերին», նպատակ դարձնել «Հայաստանի շղթաներն իտուտակելը», ինչպես դա արել են «ուրիշ ազգերը»։

3 Տե՛ս Մ. Գ. Ներսիսյան, Հայ ժողովրդի ազատագրական պայքարը թյուրքական ռոնալետության դեմ, Երևան, 1955, էջ 188—190, 473—479։

4 Տե՛ս Ռ. Փ. Հովհաննիսյան, Արևմտահայ ազգային-ազատագրական շարժումները և Կարինի «Պաշտպան հայրենյաց» կազմակերպությունը, Երևան, 1965, էջ 345—353։

Ուշագրություն չդարձնելով այն բանին, որ փոխառնված «դավադրական» և «դավադիրներ» տերմիններն իրենց այժմեական բացասական բովանդակությամբ ընթերցողին հակառակ պատկերացում են տալիս պատմական իրողության մասին, Հ. Ղազարյանը դրանք նույն իմաստներով էլ օգտագործել է անցյալ տարի լույս տեսած ուսերեն իր աշխատությունում: Նա լեհ գործիչներին համարում է «заговорщики», իսկ նորատունկյանի ծրագրի հնարավոր հետևորդներին վերագրում է «заговорщические методы», կրկին չակերտների մեջ է առնում «восстание» տերմինը, ապա և նկատում. «Связанные с поляками армянские деятели, переняв заговорщические формы и методы борьбы, действовали в отрыве от народа...»⁸.

Առանց խնդրի շուրջը ծավալվելու նույն կերպ է գնահատել նորատունկյանի ծրագիրը նաև է. Կոստանդյանը՝ վերջերս լույս տեսած իր գրքում. «Սակայն նամակագիրը ժողովրդական լայն ելույթների փոխարեն առաջարկում էր նեղ դավադրական գործելակերպ»⁹:

Զխոսելով մի շարք այլ հրատարակություններում նույն վավերագրին տրված գրեթե նույնանման գնահատությունների մասին, նշենք, որ տերմինների ոչ ճիշտ գործածության հետևանքով, ինչպես և առաջադրվող ծրագրի բուն էության մեջ բավարար չափով խորամուխ չլինելու պատճառով աղավաղվել է ազգային-ազատագրական շարժում նախապատրաստելու և ապրստամբական գործողությունների դիմելու ազգային-քաղաքական շատ ուշադրավ ծրագրի բովանդակությունը: Նորատունկյանը բոլորովին էլ դավադրության դիմելու կոչ չէր անում և հայ գործիչներին դավաճանության չէր մղում: Նա առաջարկում էր խորհել Հայաստանի դրության մասին, որոնել նրա շրջանները թոթափելու ուղիներ, իր կողմից առաջ էլքաշում պատմականորեն արդարացված փորձն ընդօրինակելու լիապես առողջ գաղափար: Ըստ նրա հարկ էր հանվել այդ փորձի վրա և համախմբել հայրենասերներին, ստեղծել փոքրաթիվ խումբ, ապա՝ խմբական, ժողովրդի մեջ երկարատև (10—60 տարի), «անդադար հաջորդաբար» աշխատանք ծավալել և «առանց վհատության» հասնել նպատակին: Դա դավադրություն չէր, այլ ընդհատակյա աշխատանքի փորձով քննության դիմացած ուղեգիծ: Նրան հետևողներն էլ բնավ դավաճաններ չէին, այլ անձնվեր գործիչներ, որոնք պատրաստ էին իրենց կյանքի գնով մարտնչել սեփական ժողովրդի ազատագրության ու փրկության համար: Թրվում է հենց այսպես պետք է ընկալել ու մեկնաբանել նորատունկյանի ծրագիրը, որը, ցավոք, պարարտ հող չգտավ, մնաց անարձագանք և շատ շուտով, հեղինակի մահվան հետ միասին, մոռացության տրվեց:

Վերջում նկատենք նաև, որ մարքսիստական գրականությունը, Մարքսի և էնգելսի մի շարք աշխատությունները մեծապես օգնում են ճիշտ ըմբռնելու հեղափոխական շարժման մեջ, նրա նախասկզբնական փուլում, մինչև բանվորական-հեղափոխական կազմակերպված պայքարի սկզբնավորումը, այսպես կոչված, «заговорщик»-ների խաղացած բուն դերը: 1852 թ. կեսերին գրախոսելով Ա. Շենյուի գիրքը, որ նվիրված է «դավադիրներին», գաղտնի կազմակերպություններին, ոստիկանության ձեռնարկումներին ու ազատ հըր-

8 Г. М. Казарян, Армянское общественно-политическое движение в 50—60-х годах XIX века и Россия, Ереван, 1979, էջ 205—207 և 294:

9 Տե՛ս է. Ա. Կոստանդյան, Գարեգին Սրվանձտյանց, Երևան, 1979, էջ 96:

ձիգներին, Մարքսը բավական մեծ տեղ է հատկացնում առաջինների գործունեությանը, ցույց է տալիս նրանց խաղացած իրական դերը՝ ապստամբական, ապա և հեղափոխական շարժման մեջ: Սի փոքր ավելի ուշ՝ նույն թվականի սեպտեմբերին, Մարքսի գրած «Մաձինիի և Կոշուտի գործողությունները» հոդվածում (ինչպես և այլ գործերում) նույնպես շոշափվում է ապստամբություն-դավադրություն հարցը, նշվում է, որ Կոշուտը «դավադիրների» հետ որոշակի կապեր ուներ¹⁰:

Վ. Ի. Լենինը նույնպես խոսում է «դավադրության» մասին՝ տերմինի մեջ դնելով քաղաքական իմաստ: Նա ուղղակի գրում է. «Նարոդովոլականի համար քաղաքական պայքարի հասկացությունը նույնական է քաղաքական դավադրության հասկացության հետ... Բլանկիզմի, դավադրականության ավանդույթները նարոդովոլականների մոտ սարսափելի ուժեղ են, այնքան ուժեղ, որ նրանք քաղաքական պայքարը չեն կարող պատկերացնել այլ կերպ, քան քաղաքական դավադրության ձևով»¹¹: Մի այլ առիթով ևս Վ. Ի. Լենինը արժարժում է «քաղաքական դավադրության» հասկացությունն ու գործելակերպը, ինչպես և պարզաբանում է «քաղաքական պայքար» հասկացության տարբեր ըմբռնումները տարբեր ժամանակներում:

«Քաղաքական դավադրության» վերոհիշյալ ըմբռնումից նորատունկյանի «դավաճանություն» և նրան վերագրված «դավադրություն» հասկացությունը շատ է հեռու: Իհարկե, ինքը՝ նորատունկյանը ևս հեռու էր նարոդովոլականների շարժումից, բուն քաղաքական պայքարից: Ազգային-ազատագրական պայքարի նրա ըմբռնման արմատը, սակայն, կարելի է տեսնել հունական, իտալական, լեհական այն ընդհատակյա շարժումների մեջ, որոնց նպատակն էր՝ հասնել իրենց ժողովրդի ազատագրությանը՝ անկախ իրենց ստացած անվանումներից, և նվաճել ազատությունը այն եղանակներով, որոնք նրանց համար ավելի մատչելի էին:

Այսպիսով, թվում է, մեր օրերում լույս տեսնող պատմագիտական երկերում անդրադառնալով հնօրյա վավերագրերին, հարկ է մեծ զգուշությամբ օգտվել նրանց տերմիններից, առավել ևս ճշգրտությամբ մեկնաբանել իմաստափոխություն ապրած արտահայտությունների բուն բովանդակությունը: Այս առումով էլ, կարծում ենք, հարկ կա նոր մոտեցում հանդես բերել նորատունկյանի առաջադրած ծրագրին, նորովի ընթերցել ու մեկնաբանել նրա նամակն ու մտքերը:

¹⁰ См. К. Маркс и Ф. Энгельс, Сочинения, т. 7, М., 1957, 268—307, т. 8, էջ 383, 478 և հտ.:

¹¹ Վ. Ի. Լենին, Երկերի լիակատար ժողովածու, հատ. 2, էջ 573—574 և հտ.:

К ТОЛКОВАНИЮ ОДНОГО ДОКУМЕНТА

Кандидат историч. наук М. Н. АКОПЯН

(Резюме)

В своем известном письме от 21 октября 1863 г. Г. Норатунікян выдвигал широкий план деятельности с целью «сокрушить оковы Ар-
мении». Пользуясь официальной терминологией своего времени, пред-
лагаемый план он назвал «заговором». В некоторых современных ис-
следованиях это слово понято в буквальном смысле, а предполагаемая
деятельность—как «заговорщицкие методы борьбы». Такое толкование
не соответствует цели и духу документа; на самом деле в нем речь идет
о подготовке к восстанию в Западной Армении.